

PM-MKB

प्रधानमंत्री नरेंद्र मोदी होंरें अज्ज अपने रेडियो कार्यक्रम मन की बात दे राहें देश-बदेश दे लोकें कन्नै बचार सांझे कीते। मन की बात कार्यक्रम दे अज्ज प्रसारित 131में एपिसोड दी शुरूआत प्रधानमंत्री होंरें नमीं दिल्ली दे भारत मंडपम च आयोजित ए.आई इम्पैक्ट शिखर सम्मेलन दे जिक्र कन्नै कीती। उनें आखेआ जे कई सारे देशें दे नेताएं उद्योगजगत दे लीडरें, नमियां काहडां कहुने आहलें ते स्टार्टअप कन्नै जुडे दे लोकें एह्दे च हिस्सा लैता। उनें आखेआ जे इस ए.आई इम्पैक्ट शिखर सम्मेलन दे दरान द'ऊं उत्पादें दुनिया भरै दे नेताएं गी बड़ा प्रभावित कीता। इन्दे चा पैह्ला उत्पाद अमूल दे बूथ पर हा जेह्दे च दस्सेआ गेआ जे ए.आई किस चाल्ली जनौरें दा इलाज करने च मनुक्खें दी मदाद करा करदा ऐ ते दुआ उत्पाद भारती संस्कृति कन्नै सरबंधत हा जेदे राहें एह् प्रदर्शित कीता गेआ जे ए.आई दी मदाद कन्नै किस चाल्ली भारत दे प्राचीन ग्रंथें, प्राचीन ज्ञान ते पांडुलिपियें गी संरक्षित करदे होई उसी अज्जै दी पीढियें मताबक ढालेआ जा'रदा ऐ। उनें आखेआ जे इस सम्मेलन च दुनिया गी ए.आई दे खेत्तर च भारत दी अनौकी समर्थ दिक्खने गी लब्बी ऐ। इस दरान भारत नै मेक इन इंडिया आहले त्रै ए.आई मॉडल बी पेश कीते। मगरा खेडुं दा जिक्र करदे होई प्रधानमंत्री होंरें एल्ले चला करदे मर्दे दे आई.सी.सी टी-20 क्रिकेट विश्व कप बारै बी बचार सांझे कीते। उनें आखेआ जे इस विश्व कप च भारती मूल दे केई ऐसे खडारी न जेह्दे होंरें देशें दी तरफा इस प्रतियोगिता च खेडुा करदे ना। उनें आखेआ जे एह् प्रवासी भारती स्थाडे देश दे कन्नोकन्नी ओकडे देशें दा नांऽ बी रौशन करा करदे न जित्थे एह् मौजूदा समें च रवा करदे ना। श्री मोदी होंरें आखेआ जे भारतीयता दी इयै खासियत ऐ जे भारतवासी जित्थे बी जंदे न अपनी मातृभूमि दिएं जडें कन्नै जुडे दे रौहंदे न ते अपनी कर्मभूमि यानि जेह्दे देशै च रौहंदे न ओह्दे विकास च बी योगदान दिंदे ना। अंगदान दे महत्व बारै बचार सांझे करदे होई प्रधानमंत्री होंरें आखेआ जे ऐसे बडे सारे लोक न जिनें अंगदान दे राहें कुसै होर गी नमां जीवन दित्ता। अज्जै दे अपने मन की बात कार्यक्रम च प्रधानमंत्री होंरें आजादी दे अमृत महोत्सव दरान लाल किले परा घोशित कीते गेदे 5 प्रणें दी गल्ल बी कीती। उनें आखेआ जे अज्ज स्थाडा देश गुलामी दे प्रतीकें गी पिच्छे छोड़ियै भारत दी समृद्ध संस्कृति कन्नै जुडी दी चीजें गी महत्व देन लगी पेदा ऐ। लोकें कन्नै होने आहली डिजिटल धोखाधडी बारै गल्ल करदे होई श्री मोदी होंरें आखेआ जे डिजिटल अरेस्ट ते डिजिटल फ्रॉड गी लेइयै स्थाडे समाज च हुन मती जागरूकता आई गेदी ऐ पर अजें बी स्थाडे आले-दोआले ऐसियां घटनां होआ करदियां न जेहिडियां माफी दे योग नेई ऐन। उनें नागरिकें दा आह्वान कीता जे ओह् सौहगे-सतर्क रौहन तां जे कोई बी जाल-साज उन्दे कन्नै माली धोखाधडी नेई करी सकै। देशै दे अन्नदाता करसानें बारै गल्ल करदे होई प्रधानमंत्री होंरें आखेआ जे करसान धरते दे सच्चे साधक न ते ओह् मिट्टी गी सुन्ना बनाने दी कला जानदे ना। उनें आखेआ जे उनेंगी एह् दिक्खियै मती खुशी होआ करदी ऐ जे स्थाडे करसान अपनी परम्परा ते नमियें तकनीकें, दौनें गी लेइयै अगे बदा करदे न ते हुन ओह् शडा उत्पादन बक्खी गै नेई सगुआं गुणवत्ता, गुणें तत्वे च बाद्दा ते नमें बजारें बक्खी बी चेचा ध्यान देआ करदे ना।

<><><><><><>

Kishtwar Encounter

किश्तवाड जिले दे पासरकुट आहले जनरल इलाके चसुरक्षाबलें ते आतंकवादिएं बश्कार टाक्करा शुरु होआ ऐ। हासल जानकारी मूजबजम्मू-कश्मीर पुलस ते सीआरपीएफ आसेआ इलाके च सांझे तौर उप्पर इक अभियानचलाया जा करदा हा जिस दरान एह् टाक्करा छिडेआ ऐ। खीरी जानकारी थहोने तगरगोलीबारी जारी ही ते सुरक्षाबलें पूरे इलाके दी घेराबंदी करी रक्खी दी ऐ। होरब्यौरै गी बलगेया जा'रदा ऐ।

<><><><><><>

Hide out Busted

सरहदी जिले पुंछ दे हडिबुडाबाउल इलाके च फौज आसेआ चलाए गेदे इक अभियान दरान आतंकवादिएं दे इक ठकाने थमां थेआर ते गोली-बरूद बरामद कीता गेआ ऐ। अपनी इक सोशल मीडिया पोस्ट च फौज दे व्हाइट नाइट कोर नै जानकारी दित्ती ऐ कि इक टकोहदी सूह दी विनाह पर कारइवाई करदे होई कोर आसेआ इलाके च इक व्यापक तुपाई अभियान चलाया गेआ जिस दरान उत्थै आतंकवादिएं दे छप्पने आहले गुफाएं आंडर दे ठकानें दा पता लग्गै जिथुआं इक पस्तोल, 2 मैगजीनां, कपडे, खाने-पीने आहला समेयान ते रोजमर्रा दे इस्तेमाल आह्लियां होर दुइयां चीजां बरामद कीता

गेआ। एह कार्रवाई बन्ने कन्नै लगदे इलाके च फौज दा वर्चस्व बनाई रखने, हर नकलोहरकत पर नेडमी तक्क रखने ते इलाके च रक्षा ते सुरक्षा गी यकीनी बनाने दे मकसद कन्नै कीती गई ऐ।

<><><><><><>

IED-Recovered

कश्मीर घाटी दे गांदरबल इलाके च सुरक्षा बलें इक आई.ई.डी विस्फोटक बरामद करियै उसी नकारा कीता ते कुसै बड्डी माडी घटना गी होने सवां टाली दित्तां जानकारी मूजब एहू आई.ई.डी फोहेस्तान कलोनी कश गुलाब शेख महल्ले च सड्कै कंडे इक झोले च छपैलिये रखेआ गेदा हा। एहू जगह जिले दे सफापोरा इलाके च पौंदी ऐ। आई.ई.डी दा पता लगदे गै सुरक्षाबलें सड्कै पर गड्डिएं दी आओजाई रोकी दित्ती। तुरत बम्ब नकारा करने आह्ले दस्ते गी सद्देआ गेआ ते इसी नकारा करी दित्तां इस दरान कुसै गी कोई नुकसान नेई पुज्जा ते कोई बड्डा हादसा होने शा टली गेआ।

<><><><><><>

NMC-PG Seats

जम्मू-कश्मीर च विशेष मेडिकल शिक्षा गी बढावा दिंदे होई राश्ट्री चिकित्सा आयोग नै जम्मू ते श्रीनगर दे सरकारी मेडिकल कालजें दे कन्नोकन्नी स्किम्स, सौरा श्रीनगर च 24 नमियें सुपर स्पैशिलिटी पी.जी सीटें गी मंजूरी दित्ती ऐ। मंजूर कीती गेदी सीटां Cardiology, Urology, Pulmonary Medicine, Medical, Gastroenterdogy, Paediatric surgery, Neuro Anasthesia, Neonatal Anesthesia Clinical Immunology ते Rheumatology ज्नेह खेत्तरें च दित्ती गेदियां ना। इस घोशणा दा सोआगत करदे होई सेहत ते मेडिकल शिक्षा मंत्री सकीना इत्तू होरें इसी इक संगेमील करार दित्ता। उनें आखेआ जे एहू परिवर्तनकारी गैं जम्मू-कश्मीर च विशेष सेहत सरबंधी बुनियादी ढांचे ते मेडिकल शिक्षा दे मौकें दे विस्तार लेई सरकार दी बचनबद्धता गी उजागर करदी ऐ।

<><><><><><>